



*Ioseph prend à femme Aseneth fille du grand Prestre, dont sont
issus Manassé & Ephraïm.*

LE Roy Pharaon continuant sa faueur & bonne volonté enuers Ioseph, pour luy auoir predict les sept années d'abondance de tous biens, ce qu'il voyoit estre aduenu en son pais, c'estoit ce qui luy donnoit assurance, que pareillement il y auroit sept autres années de sterilité & famine vniuerselle ; voulut que Ioseph, qui estoit lors âgé de trente ans, prist à femme Aseneth fille de Putifar grand Prestre de Heliopolis, auquel mariage fut fait vn banquet & festin solennel, & ce par le commandement du Roy, pour l'amitié qu'il portoit à Ioseph, auquel (auant que l'année de la famine vint en Egypte) sa femme Aseneth enfanta deux enfans, & appella le premier né, Manassé, disant, Dieu m'a fait oublier tous les trauaux de mon pere : & appella le nom du second, Ephraïm, disant, Dieu m'a fait fructifier en la terre de ma paureté. Adonc finirent les sept années de fertilité qui auoient esté en Egypte, puis commencerent les autres sept années de sterilité, qui fut cause d'vne famine autant generale que pitoyable par toute l'Egypte.